

A UN N. H.

Lustrissim,

in chê schirie di basavons e strabasavons che Lui al à inclaudâz su pai mûrs di cjase sô, a' saran — 'o scrupuli — ghignis d'ogni sete: al càpite ancje tes famèis plui di sest; e te storie de nobiltât furlane s'indi lèi d'ogni colôr. Ma, par mâl ch'è sei lade, plui di qualchidun dai viei de Sô 'ristocratiche Zocje, al à lassât un stamp indulà ch'al è passât, al si à quistade une inomine, al à fat onôr a chel fregul di sanc turchin ch'al pensave di sin tîsi sgripiâ tes venis: o cu le spade o cul penâl o cu la mitrie; o in art o in deplomazie o te sienze; o cu la bardele o cu la furbarie o cu lis palanchis.

Cumò, si sa, i ajars a' son voltâz: al sanc turchin nissun crôt plui; daûr des stemis nissun si volte, parvie che la scunsulte araldiche 'e rive adore di cjatâ une steme ancje al ultin sclapezocs, a presi rot; lis grassis renditis di une volte a' son ladis a fâsi foti o par vizis o par cjative ministrazion o par qualchi malore o par trascuranze o par massepassudèrie; e fintremai un vilanat come me al à cûr di tratâ cun tun «hidalgo» come Lui, tan'che s'al fos so fradi.

Lui, paraltri, nol è di dî ch'al vadi atôr cul cul imblecât: il so fatôr al mi à spiât che un miez milionut al mês, net di spesis e di tassis, j salte fûr ancjemò des proprietâz ch'al à ca e là pe Furlanie. E Lui, puarìn, nol sa cemût fâ a spindilu! Al si strissine atôr pes zitâz d'Italie o di furviè, pes localitâz plui inomenadis, daûr di qualchi cotulate o atôr dai taulins verz o 'es corsis dai cjavai o sao jo indulà. Se, par cuminazion, j tocje di tornâ chenti qualchi dì, par dâ une voglade 'e cjanive o par ristorâ il tacuìn, al fâs juste une scjampade al «Dorta» a saludâ qualchi mumie roseade de sifilide, — di chês che salacôr a' jàn vendût l'ultin quadri di valôr o l'ultime raritât bibliografiche o l'ultime flaide — e al torne a partî be'svelt. Cemût varessial mai di fâ a vivi in cheste mufe provinziâl?

I carantans Lui ju gjave fûr, cence gote di sudôr, de tiare furlane o dal sudôr dai furlans ma a spindiju al va a Vignesie o a Milan, o a Monaco o à Meran o là dal diaul ch'al ûl. Pal Friûl, pe so int, par miorâ la so tiare, o lis cjasis dai sotans, par qualchi opare o iniziative nostrane, Lui nol smole un cràizar; i siei bêz Lui al à di gjoldiju, dal prin al ultin, indulà che j comude e cemût che j smeche, nomo? Culì al molz, ma al va a strucjâ in altris sîz: e cence un custrut, cence un vantaz pusitîf, cence lassâ nuje di nuje daûr di sé. Dai siei vons al à reidate l'indèe feudâl che, di ce ch'al è so, nol à di rindi cont a nissun. Uelial savê ce ch'al è Lui? Un ch'al vîf par intrîc.

J covential un braz di cuarde e un toc di savon? 'E sares l'uniche. Patron.

(Patrie dal Friûl – 1950)